

Lei 6/1984, do 5 de xuño, do Valedor do Pobo

Tramitación parlamentaria:

Proposición de lei, BOPG núm. 49, 15.12.1982.

Debate e toma en consideración polo Pleno, DSPG núm. 26, do 16.2.1983.

Emendas, BOPG núm. 167, do 22.10.1983.

Informe da Ponencia, BOPG núm. 194, do 19.12.1983.

Dictame da Comisión, BOPG núm. 251, do 13.4.1984.

Debate e aprobación polo Pleno, DSPG núm. 77, do 5.6.1984.

Publicación:

Boletín Oficial do Parlamento de Galicia núm. 287, do 12.6.1984.

Diario Oficial de Galicia núm. 135, do 14.7.1984.

Boletín Oficial del Estado núm. 77, do 30.3.1985.

Lei 6/1984, do 5 de xuño, do Valedor do Pobo

Pola Lei 3/1994 engadíuselle ademais un novo título V, coa adición dos artigos 38, 39 e 40. Por esta mesma Lei 3/1994 foron modificados os artigos 1.1 e 1.3, 5.3 e 5.4, 8 *in fine*, 9.1 e 9.3, 10, 12, 13.1, 16.1, 16.3 e 16.4, 18.1, 22.2, 29, 34 e 37.2, así como os enunciados do título I e do seu capítulo I, do capítulo I do título II e do título IV.

Pola Lei 1/2002 foron modificados os artigos 8 e 9.1 . Pola Lei 8/2008 foi modificado o artigo 8.

Pola Lei 10/2012, foron modificados os artigos 5.1, 5.2, 5.4, 8, 9, 10.2, 11, 12, 16.4, 18.1, 19, 22.1, 23, 27, 34, e engadidas as disposicións adicionais bis e ter.

Pola Lei 1/2016 foi modificado o artigo 10.2

Regulada a Institución do Defensor del Pueblo pola Lei Orgánica 3/1981, do 6 de abril, en desenvolvemento do disposto no artigo 54 da Constitución, e recollido no artigo 14 do Estatuto galego o dereito da Comunidade Autónoma á creación e organización mediante Lei do Parlamento de Galicia dun órgano similar, resulta conveniente a súa creación e regulación para completar en materia tan relevante a institucionalización autonómica de Galicia e abrir novas vías que completen a garantía dos dereitos que consagra o Título I da Constitución no funcionamento transparente e eficaz da Administración Pública de Galicia.

A relación entre a Administración Autónoma e os cidadáns, pola súa especial intermediación, ó carón das súas indiscutibles vantaxes, entraña o risco de que poidan orixinarse comportamentos impropios, alonxados da estricteza e igual aplicación das normas, o cal suliña aínda máis a importancia da figu-

ra na Comunidade Autónoma de Galicia.

O texto da presente Lei, aínda seguindo as grandes liñas da Lei Orgánica do Defensor del Pueblo, procura, sen desnaturaliza-lo seu carácter, ensancha-las súas funcións, facendo uso da habilitación contida no artigo 14 do Estatuto de Autonomía de Galicia, e profundizar no sentido dunha maior eficacia no exercicio das funcións do Valedor do Pobo.

A Lei contén tamén normas harmonizadoras da actividade do Valedor do Pobo e a homóloga institución estatal, sobre o principio de cooperación establecido no artigo 12 da Lei 3/1981, do 6 de abril.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Galicia e co artigo 24 da Lei 1/1983, do 22 de febreiro, reguladora da Xunta e do seu Presidente, promulgo, en nome de El-Rei, a Lei do Valedor do Pobo.

Título I

Carácter, nomeamento, cese, prerrogativas e incompatibilidades⁽¹⁾

Capítulo I

Carácter, nomeamento e cese⁽²⁾

Artigo 1

1. O Valedor do Pobo é o alto comisionado do Parlamento de Galicia para a defensa, no ámbito territorial da Comunidade Autónoma, dos dereitos comprendidos no Título I da Constitución e o exercicio das demais funcións que esta Lei lle atribúe.⁽³⁾

2. A actividade do Valedor do Pobo extenderase á tutelela dos dereitos individuais e colectivos emanados do Estatuto de Autonomía, en especial, os sancionados no seu Título Preliminar.

3. A estes fins, poderá supervisar a actividade da Administración da Comunidade Autónoma de Galicia e dos seus entes e empresas públicas ou dependentes, exercendo as funcións que lle enco-

mendan o Estatuto de Autonomía e a presente Lei.⁽⁴⁾

Artigo 2

1. O Valedor do Pobo será elixido polo Parlamento de Galicia para un período de cinco anos.

2. A proposta de candidato ou candidatos a Valedor do Pobo será realizada pola Comisión de Peticións ó Pleno do Parlamento de Galicia. A estes efectos será suficiente a maioría simple para a adopción de acordos da Comisión.

3. Proposto o candidato ou candidatos, convocarase, nun prazo non inferior a 15 días, o Pleno do Parlamento para que proceda á elección. Será designado quen obtivese unha votación favorable das tres quintas partes dos membros do Parlamento.

4. No suposto de que ningún candidato acadase a maioría establecida no apartado anterior, procederase pola Comisión de Peticións, no prazo máximo dun mes, á formulación de sucesivas propostas seguidas das correspondentes votacións ata a obtención da maioría sinalada.

Artigo 3

1. Poderá ser elixido Valedor do Pobo calquera cidadán que goce da condición política de Galego, se encontre no pleno disfrute dos

(1) Reprodúcese a versión orixinaria. O enunciado do título I foi modificado polo artigo segundo da Lei 3/1994.

(2) Reprodúcese a versión orixinaria. O enunciado do capítulo I do título I foi modificado polo artigo segundo da Lei 3/1994.

(3) Reprodúcese a versión orixinaria. O apartado 1 do artigo 1 foi modificado polo artigo primeiro da Lei 3/1994.

(4) Reprodúcese a versión orixinaria. O apartado 3 do artigo 1 foi modificado polo artigo primeiro da Lei 3/1994.

seus dereitos civís e políticos e coñeza os idiomas oficiais de Galicia.

2. O nomeamento do Valedor do Pobo será acreditado polo Presidente do Parlamento e publicado no *Diario Oficial de Galicia*.

3. O Valedor do Pobo tomará posesión do seu cargo ante a Mesa do Parlamento, dentro dos quince días seguintes á publicación do seu nomeamento. Prestará xuramento ou promesa de fiel cumprimento das súas funcións.

Artigo 4

1. A Comisión de Peticións do Parlamento de Galicia será encargada das relacións co Valedor do Pobo e informará ó Pleno en cantas ocasións sexa necesario.

2. O Valedor do Pobo dirixirase, de ordinario, ó Parlamento a través do Presidente do mesmo.

Artigo 5

1. O Valedor do Pobo de Galicia cesará por algunhas das seguintes causas:

1.^a) Por renuncia.

2.^a) Por expiración do prazo do seu nomeamento.

3.^a) Por morte ou incapacidade sobrevida.

4.^a) Por notorio incumprimento das obrigas e deberes do seu cargo.

5.^a) Por ser condenado, mediante sentenza firme, por delito doloso.

2. O Presidente do Parlamento declarará a vacante do cargo nos supostos de morte, renuncia ou expiración do prazo do mandato. Nos outros casos, decidirá o Pleno do Parlamento pola maioría establecida das tres quintas partes dos membros do Parlamento, mediante debate e previa audiencia do interesado.

3. Vacante o cargo, iníciase, no prazo non superior a un mes, o procedemento para a elección dun novo Valedor do Pobo.⁽⁵⁾

4. A Comisión de Peticións poderá acordar por maioría simple, mentres non se cubra a vacante, o desempeño das funcións do Valedor do Pobo polos Vicevaledores, interinamente, na súa propia orde.⁽⁶⁾

Capítulo II

Prerrogativas e incompatibilidades

Artigo 6

1. O Valedor do Pobo de Galicia non estará suxeito a mandato

(5) Reprodúcese a versión orixinaria. O apartado 3 do artigo 5 foi modificado polo artigo primeiro da Lei 3/1994.

(6) Reprodúcese a versión orixinaria. O apartado 4 do artigo 5 foi modificado polo artigo primeiro da Lei 3/1994.

imperativo ningún. Non recibirá instrucións de ningunha autoridade. Desempeñará as súas funcións con autonomía e segundo o seu criterio.

2. O Valedor do Pobo gozará das prerrogativas e garantías necesarias para o cumprimento da súa función, de acordo coa lexislación vixente.

Artigo 7

1. A condición de Valedor do Pobo é incompatible con todo mandato representativo, cargo político ou actividade de propaganda política; coa permanencia en servizo activo de calquera Administración Pública; coa condición de membro de Partido Político ou co desempeño de funcións directivas nun Partido, Sindicato, Asociación ou Fundación, ou co emprego ó servizo dos mesmos; co exercicio das carreiras xudicial e fiscal ou de calquera actividade profesional, xudicial, mercantil ou laboral.

2. O Valedor do Pobo deberá cesar na situación de incompatibilidade na que se atope antes de tomar posesión do cargo. No caso contrario entenderase que non acepta o nomeamento.

3. No suposto de incompatibilidade sobrevida entenderase que renuncia ó cargo na data na que se producise aquela.

Título II

Medios persoais e materiais

Capítulo I

Vicevaledores e Asesores⁽⁷⁾

Artigo 8

O Valedor do Pobo estará auxiliado por dous Vicevaledores, primeiro e segundo, nos que poderá delegar-las súas funcións, e que o substituirán, pola súa orde, no exercicio das mesmas, segundo o disposto no artigo 4.4.^o⁽⁸⁾ da presente Lei.⁽⁹⁾

Artigo 9

1. O Valedor do Pobo nomeará, previa conformidade da Comisión de Peticións, os Vicevaledores do Pobo e poderá cesalos libremente.⁽¹⁰⁾

2. O nomeamento e cese dos Vicevaledores serán publicados no *Diario Oficial de Galicia*.

3. Ós Vicevaledores seralles de aplicación o disposto para o Va-

(7) Reprodúcese a versión orixinaria. O enunciado do capítulo I do título II foi modificado polo artigo segundo da Lei 3/1994.

(8) A remisión enténdese feita ó artigo 5.4.

(9) Reprodúcese a versión orixinaria. O artigo 8, *in fine*, foi modificado polo artigo primeiro da Lei 3/1994.

(10) Reprodúcese a versión orixinaria. O apartado 1 do artigo 9 foi modificado polo artigo primeiro da Lei 3/1994.

ledor do Pobo nos artigos terceiro, quinto e sexto da presente Lei.⁽¹¹⁾

Artigo 10

1. O Valedor do Pobo poderá designar libremente os asesores necesarios para o exercicio das súas funcións dentro dos límites presupostarios.

2. As persoas que se encontren ó servicio do Valedor do Pobo, consideraranse persoas ó servicio do Parlamento mentres permanezan no exercicio da súa función.

3. Os funcionarios provenientes das Administracións Públicas, adscritos á oficina do Valedor do Pobo, terán dereito á reserva de praza e destino ocupados con anterioridade e ó cómputo a tódolos efectos do tempo transcorrido nesa situación.⁽¹²⁾

Artigo 11

Os Vicevaledores e os asesores adscritos á oficina do Valedor do Pobo cesarán automaticamente no momento da toma de posesión dun novo Valedor do Pobo nomeado polo Parlamento.

(11) Reprodúcese a versión orixinaria. O apartado 3 do artigo 9 foi modificado polo artigo primeiro da Lei 3/1994.

(12) Reprodúcese a versión orixinaria. O artigo 10 foi modificado polo artigo primeiro da Lei 3/1994.

Capítulo II

Dotación económica

Artigo 12

A dotación económica necesaria para o funcionamento da Institución constituirá unha partida do Presuposto do Parlamento de Galicia.⁽¹³⁾

Título III

Do procedemento

Capítulo I

Atribucións e facultades

Artigo 13

1. O Valedor do Pobo poderá iniciar e proseguir, de oficio ou a instancia de parte, calquera investigación sobre os actos e as resolucións da Administración Pública da Comunidade Autónoma e os seus axentes.⁽¹⁴⁾

2. As facultades do Valedor do Pobo extenderanse á actividade que realicen os Conselleiros e calquera autoridade administrativa, funcionario e axente que actúen ó servicio da Administración da Comunidade Autónoma e ós seus entes ou empresas dependentes.

(13) Reprodúcese a versión orixinaria. O artigo 12 foi modificado polo artigo primeiro da Lei 3/1994.

(14) Reprodúcese a versión orixinaria. O apartado 1 do artigo 13 foi modificado polo artigo primeiro da Lei 3/1994.

Artigo 14

1. Toda persoa natural ou xurídica que invoque un interés lexítimo poderá dirixirse ó Valedor do Pobo sen restricción nin limitación ningunha.

2. Os deputados individualmente, e as Comisións do Parlamento de Galicia relacionadas coa defensa dos dereitos e liberdades públicas, poderán solicita-la intervención do Valedor do Pobo en tódalas cuestións atribuídas á súa competencia.

3. A Comisión de Peticións poderá ademais transmitirle as que reciba nos términos do artigo 48 do Regulamento do Parlamento Galego.

4. Ningunha autoridade administrativa, no ámbito da súa competencia, poderá presentar queixas perante o Valedor do Pobo.

Artigo 15

1. A actividade do Valedor do Pobo de Galicia non se verá interrompida nos casos en que o Parlamento non se encontre reunido, fose disolto ou expire o seu mandato. Nos citados casos o Valedor do Pobo de Galicia dirixirase á Deputación Permanente da Cámara.

2. A declaración dos estados de excepción ou sitio non interromperá a actividade do Valedor do Pobo, nin o dereito dos cidadáns de acceder ó mesmo, sen prexuício do disposto nos artigos 55 e 116 da Constitución.

Artigo 16

1. O Valedor do Pobo, de oficio ou a instancia de parte, poderá supervisa-la actividade da Administración da Comunidade Autónoma Galega para garantiza-lo respecto dos dereitos comprendidos no Título I da Constitución e o seu sometemento pleno á Lei e ó Dereito.⁽¹⁵⁾

2. As facultades atribuídas ó Valedor do Pobo extenderanse igualmente de maneira especial á defensa dos dereitos e principios rectores que dimanan do título preliminar do Estatuto de Autonomía de Galicia.

3. Respecto das demais administracións públicas exercerá as funcións que, dentro dos principios de coordinación e cooperación establecidos no artigo 12 da Lei Orgánica 3/1981, do 6 de abril, lle correspondan.⁽¹⁶⁾

4. Cando para o exercicio das súas funcións necesite a colaboración de institucións análogas doutras Comunidades, a petición dirixirase ó Defensor do Pobo a través do Presidente do Parlamento.⁽¹⁷⁾

(15) Reprodúcese a versión orixinal. O apartado 1 do artigo 16 foi modificado polo artigo primeiro da Lei 3/1994.

(16) Reprodúcese a versión orixinal. O apartado 3 do artigo 16 foi modificado polo artigo primeiro da Lei 3/1994.

(17) Reprodúcese a versión orixinal. O apartado 4 do artigo 16 foi suprimido polo artigo primeiro da Lei 3/1994.

Capítulo II

Tramitación das queixas

Artigo 17

As queixas que o Valedor do Pobo reciba referidas ó funcionamento da Administración de Xusticia de Galicia deberá dirixilas ó Ministerio Fiscal e ó Consello do Poder Xudicial, sen prexuício de incluílas no informe ó Parlamento.

Artigo 18

1. Toda queixa dirixida ó Valedor do Pobo deberá de ser formulada por escrito no que conste a identificación, domicilio ou enderezo do peticionario e se relate o feito que a motiva. Irá suscrita ou asinada no seu caso polo solicitante.⁽¹⁸⁾

2. Acusarase recibo de toda queixa que sexa rexistrada.

3. As queixas ó Valedor do Pobo deberanse presentar no prazo dun ano cumprido a partir do coñecemento dos feitos.

4. A actuación do Valedor do Pobo e a dos seus colaboradores será gratuíta para o interesado.

5. Non será preceptiva a intervención ou asistencia de Letrado nin Procurador.

Artigo 19

O Valedor do Pobo tramitará ou rexeitará as queixas recibidas.

Neste último suposto, mediante escrito motivado no que se poderá informar ó interesado do máis oportuno en Dereito á súa actuación.

Artigo 20

O Valedor do Pobo de Galicia non entrará no exame individual daquelas queixas sobre as que estea pendente resolución xudicial e suspenderao se, iniciada a actuación, se interpuxese por persoa interesada demanda ou recurso ante os Tribunais Ordinarios ou o Tribunal Constitucional. Isto non impedirá, sen embargo, a investigación sobre os problemas xerais plantexados nas queixas presentadas. En calquera caso velará porque a Administración resolva expresamente, no tempo e na forma, as peticións e recursos que lle fosen formulados.

Artigo 21

O Valedor do Pobo de Galicia rexeitará as queixas anónimas e poderá rexeitar aquelas nas que se advirta mala fe, carencia de fundamento, inexistencia de pretensión, así como aquelas outras das que a tramitación irroque prexuício ó lexítimo dereito de terceira persoa. As súas resolucións non serán susceptibles de recurso.

Artigo 22

1. Admitida a trámite unha queixa, o Valedor do Pobo promoverá a oportuna investigación sumaria e informal. En todo caso, informará ó Organismo ou Depen-

(18) Reprodúcese a versión orixinaria. O apartado 1 do artigo 18 foi modificado polo artigo primeiro da Lei 3/1994.

dencia Administrativa do contido substancial da solicitude, recabando cantos datos coide pertinentes que terán que serlle remitidos no prazo de quince días, a non ser que a complexidade do asunto aconselle, ó seu criterio, outro maior.

2. A negativa ou negligencia de calquera Organismo, funcionario ou dos seus superiores responsables ó envío do informe inicial solicitado, poderá ser considerada polo Valedor do Pobo de Galicia como hostil e entorpecedora das súas funcións, facéndoa pública de inmediato e destacando tal calificación no seu informe anual ou especial, no seu caso, ó Parlamento.⁽¹⁹⁾

Capítulo III

Tramitación da investigación

Artigo 23

No exercicio das súas funcións, o Valedor do Pobo, os seus adxuntos ou persoa na que delegue, poderá personarse en calquera Centro ou Dependencia da Administración Pública da Comunidade Autónoma Galega, dos seus entes e empresas públicas dependentes da mesma ou afectos a un servizo público, para a comprobación de datos, realización de entrevistas persoais, estudo de expedientes e documentos relacionados co motivo da súa actuación sen que se lle

poida nega-lo exame da documentación interesada, excepto nos casos taxativamente establecidos pola Lei.

Artigo 24

1. Cando a queixa que se vaia investigar afectase á conducta das persoas ó servizo da Administración Pública Galega, en relación coa función que desempeñan, o Valedor do Pobo de Galicia dará conta da mesma ó afectado e ó seu inmediato superior ou Organismo de que aquel dependese.

2. O afectado responderá por escrito e coa aportación de cantos documentos e testemuños coide oportunos, no prazo que lle fose fixado, que en ningún caso será inferior a dez días, podendo ser prorrogado a instancia de parte pola metade do concedido.

O Valedor do Pobo de Galicia poderá comproba-la súa veracidade e propoñer ó funcionario afectado unha entrevista ampliatoria de datos. Os funcionarios que se negasen a isto poderán ser requiridos por aquel para que manifestaren por escrito as razóns que xustificquen tal decisión.

3. O superior xerárquico ou organismo que prohíba ó funcionario ás súas ordes ou servizo responder á requisitoria do Valedor do Pobo de Galicia ou entrevistarse con el, deberá manifestalo por escrito debidamente motivado, dirixido ó funcionario e ó propio Valedor do Pobo de Galicia. Este dirixirá en adiante cantas

(19) Reprodúcese a versión orixinaria. O apartado 2 do artigo 22 foi modificado polo artigo primeiro da Lei 3/1994.

actuacións investigadoras sexan necesarias ó referido superior xerárquico.

4. A información que no curso dunha investigación poida aportar un funcionario a través do seu testemuño persoal terá o carácter de reservada sen prexuício do disposto na Lei de Enxuciamiento Criminal sobre a denuncia de feitos que puidesen revestir carácter delictivo.

Artigo 25

Cando o Valedor do Pobo, por razón do exercicio das funcións propias do seu cargo, teña coñecemento dunha conducta ou feito presumiblemente delictivo comunicarllo ó Ministerio Fiscal de quen poderá solicitar información sobre o estado de tramitación no que se encontren as actuacións iniciadas á súa instancia.

Capítulo IV

Deber de colaboración

Artigo 26

1. Os poderes públicos de Galicia están obrigados a prestalo auxilio e cooperación que lles sexan demandados polo Valedor do Pobo nas súas investigacións e actuacións.

2. Nos supostos en que a obtención de datos ou a prestación de auxilio resultase preciso obtelas fóra do ámbito territorial da Comunidade Autónoma, o Valedor do

Pobo poderá solicitalos do Defensor do Pobo ou doutras Institucións similares de acordo cos principios de coordinación e cooperación establecidos na Lei Orgánica 3/81, do 6 de abril.

Artigo 27

Se as autoridades, funcionarios ou axentes dificultasen ou empecesen a actuación do Valedor do Pobo, dos seus adxuntos ou delegados, aquel dará conta ó superior xerárquico e, no seu caso, ó Ministerio Fiscal para o exercicio das accións que poidan proceder, recollendo tales actitudes nos seus informes ó Parlamento de Galicia.

Capítulo V

Gastos causados a particulares

Artigo 28

Os gastos efectuados ou os prexuícios materiais, causados ós particulares que non promovesen a queixa, ó seren chamados a informar polo Valedor do Pobo, serán compensados con cargo ó seu presuposto unha vez xustificadas debidamente.

Capítulo VI

Das Resolucións

Artigo 29

O Valedor do Pobo poderá suxerir á Administración Pública modificación nos criterios utilizados

na produción dos actos e resolucións daquela.⁽²⁰⁾

Artigo 30

Se o Valedor do Pobo de Galicia, como consecuencia das súas investigacións, chegase ó convencemento de que o cumprimento rigoroso dunha norma pode provocar situacións inxustas ou prexudiciais para os administrados, poderá suxerir ó Parlamento de Galicia ou á Administración a modificación da mesma.

Artigo 31

O Valedor do Pobo poderá instar das autoridades administrativas competentes o exercicio das súas facultades de inspección e sanción se as actuacións se realizaron con ocasión de servicios prestados por particulares en virtude de acto administrativo habilitante.

Artigo 32

1. O Valedor do Pobo, con motivo das súas investigacións, poderá formular ás autoridades e funcionarios das Administracións Públicas advertencias, recomendacións, recordatorios dos seus deberes legais e suxerencias para a adopción de novas medidas.

2. Estes funcionarios e autoridades deberán responder sempre por escrito e no prazo dun mes.

(20) Reprodúcese a versión orixinaria. O artigo 29 foi modificado polo artigo primeiro da Lei 3/1994.

Artigo 33

1. Se formuladas as súas recomendacións, non obtivese resposta ou, nun prazo razoable, non se producise unha medida adecuada ó suxerido, o Valedor do Pobo poderá poñerlos antecedentes do escrito e as recomendacións efectuadas en coñecemento do Conselleiro do Departamento afectado ou da máxima autoridade da Administración Pública Galega.

2. Se tampouco obtivese unha xustificación adecuada incluírá tal asunto no seu informe anual ou especial, con mención dos nomes das autoridades ou funcionarios que persistan naquela actitude, especialmente nos casos nos que, considerando o Valedor do Pobo que era posible unha solución positiva, esta non se conseguise.

Capítulo VII

Modificacións e notificacións

Artigo 34

O Valedor do Pobo informará ó interesado ou, no seu caso, ó Deputado ou Comisións a que se refire o artigo 13⁽²¹⁾ desta Lei, do resultado das súas investigacións e xestións, así como da resposta que dese a Administración ou funcionarios implicados, agás que pola súa natureza aquelas fosen consideradas, de acordo coa Lei, de

(21) A remisión enténdese feita ó artigo 14.

carácter reservado ou declaradas secretas. Así mesmo, cando acorde non intervir, informará razoando a súa decisión.⁽²²⁾

Artigo 35

Cando as actuacións practicadas mostren que a queixa se orixinou presumiblemente por abuso, arbitrariedade, discriminación ou erro, negligencia ou omisión dun funcionario, o Valedor do Pobo dirixirase ó interesado, facéndolle constalo seu criterio ó respecto, e ó seu superior xerárquico, formulando as suxerencias que estime oportunas.

Título IV

Do informe anual⁽²³⁾

Artigo 36

1. O Valedor do Pobo dará conta anualmente ó Parlamento da xestión realizada nun informe que presentará ante o mesmo no período ordinario de sesións.

2. Cando a gravidade ou urxencia dos feitos o aconsellen, poderá presentar un informe extraordinario dirixido á Deputación Permanente do Parlamento se este non estivese reunido ou se encontrase disolto.

(22) Reprodúcese a versión orixinaria. O artigo 34 foi modificado polo artigo primeiro da Lei 3/1994.

(23) Reprodúcese a versión orixinaria. O enunciado do título IV foi modificado polo artigo segundo da Lei 3/1994.

3. Os informes anuais e, no seu caso, os extraordinarios serán publicados.

Artigo 37

1. O Valedor do Pobo de Galicia no seu informe anual dará conta do número de tipos de queixas presentadas, daquelas que foron rexeitadas e as súas causas, así como das que foron obxecto de investigación e o resultado da mesma, con especificación das suxerencias ou recomendacións admitidas pola Administración Pública Galega.

2. No informe non constarán datos persoais que permitan a pública identificación dos interesados no procedemento investigador sen prexuício do disposto no artigo 26 da presente Lei.⁽²⁴⁾

3. Nos casos especialmente graves, o Valedor do Pobo poderá destacar no seu informe anual a persistencia nunha actitude hostil ou entorpecedora ó seu labor de calquera Organismo, funcionario ou persoa ó servizo da Administración Pública, no seu ámbito de competencias.

4. O informe conterá igualmente un anexo, destinado ó Parlamento de Galicia, no que se fará constar a liquidación do presuposto da Institución no período que corresponda.

(24) Reprodúcese a versión orixinaria. O apartado 2 do artigo 37 foi modificado polo artigo primeiro da Lei 3/1994.

5. Un resumo do informe será exposto oralmente polo Valedor do Pobo ante o Pleno do Parlamento.

(25)

Disposición adicional

Autorízase ó Valedor do Pobo para dicta-las normas regulamentarias precisas para o desenvolvemento da presente Lei, de acordo coa Mesa do Parlamento e a Comisión de Peticións.

Estas normas regulamentarias publicaranse no *Boletín Oficial do Parlamento de Galicia*.

Disposición transitoria

A Comisión de Peticións propondrá ó Pleno da Cámara, no prazo máximo de seis meses computados desde o día da entrada en

vigor da presente Lei, o candidato ou candidatas a Valedor do Pobo de Galicia mediante acordo adoptado por maioría simple.

Disposición final

O Valedor do Pobo, transcorrido un ano do exercicio das súas funcións, poderá propoñer ó Parlamento no informe anual, ou noutro extraordinario, as modificacións no texto da presente Lei que xulgue oportunas á luz da aplicación práctica da mesma.

Santiago de Compostela, 5 de xuño de 1984

Gerardo Fernández Albor
Presidente

(25) Polo artigo segundo da Lei 3/1994 engadíuselle a esta lei un novo título V, coa adición dos novos artigos 38, 39 e 40.